

# LAFORÊT

Félibre-carretié de Sant-Gile

# Gàubi d'enfant



**C.I.E.L. d'Oc**

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

# INTROUDUCIOUN

“ La meiouro di prefàci pèr toun libre, me dis dins sa letro dóu 24 d’abriéu Frederi Mistral, es aquelo mounte nous diras, tu-meme, coume siés devengu felibre “. Lou Mèstre s’estènt espremi d’aquéu biais, n’avièu plus qu’à segui sa dicho e à faire, au legeire, lou raconte di fa que, treboulant moun èsse, avien enfluï sus ma vido.

Dève au bonur d’èstre paire aquéu d’èstre un brisoun pouèto; e, se quaucun s’amerito la dedicàci d’aquest libre, es mis enfant que sèmlon agué pres pèr toco de me dita tóuti li jour quàuqui sujèt nouvèu. — Mai lou fa lou mai pretoucant, aquéu qu’es primadié, lou veici: lou 5 d’abriéu 1904, aviéu passa la journado à Sant-Gile; uno journado tant longo, longo que lis ouro m’èron de semano. Lou sèr, au darrié trin, arribave en Arle, e lèu m’adraiave au maset, en Trebon, lou cor talamen pounchouneja, l’amo talamen ensournido, que semblavo bèn miés qu’anave à l’endavans d’un malur. Es en van qu’espinchave se, pèr alin, dins la draiolo di tamarisso, entre-vesiéu pas la femo émé lou pichot sus si bras. — Res !.. Ah! fuguèron lèu franqui li quàuqui centenau de mètre qu’avièu encaro à faire. — Traversère li gara pèr acourchi, segur, aquesto fes, que mi pressentido de la journado n’èron que trop veraio. — E d’efèt, lou pichot qu’aviéu leissa, lou matin, fres, escarrabiha e ajougui, eissejavo, plagnitiéu, dins soun brès. — La maire, desvariado, èro clinado subre éu, despeitrinado, assajant pèr la desenco fes de lou faire teta; pèr la desenco fes, refusavo lou sen! Quau es que nous dira ço que souffris uno maire que sènt raia, dins si veno, de flot de vido que regounflon sèns pousqué n’en pourgi à la car de sa car! Quau depintara lis afan d’un paire que vèi, despoudera, s’amoussa plan-planet lou lume de sis espèro ! E, podon rèn faire, éli; e, li poutoun e li lagremo arrèston pas, d’uno souleto minuto, aquéu plang doulènt que ié tanco, sèmpe mai prefound dins lou cor, lou clavèu de l’angouisso.

Es en van que lou brave e saberu Moussu Morizot, d’Arle, dounavo, em’uno afecioun mai-que-mai assiduo, tout ço que la sciènci i’avié vuja de couneissènço. Rèn ié fasié! Chasque jour apoundié un velet de mai à noste tristun. Semblavo vertadieramen que la Mort aguèsse marca noste angeloun de soun estampiho de dóu. Touto uno semano, fuguerian ansin bourroula, coume atupi, de ço que nous anavo arriba. E, quand regarde, vuei, lou bèu sagatun que crèis drud coume lou grame, aquéu bèu drole en quau si quatre an fan uno lèi d’èstre insoucitous, me demandariéu quasimen, s’es bèn éu que nous a fa passa pèr lis estamino que vène de rapela.

Ah ! lou jour qu’, après un darrié remèdi counseia pèr aquéu brave dótour, s’arrestè d’eisseja, e que lou veguerian, pamens, s’apasima e repausa sèns fèbre soun paure cors doulènt e meigrinèu: queto raiado d’espèr! quéti raive estrambourdant pèr nòstis amo! Que trefoulimen de joio, quouro, après aquéu som bèn-fasènt, en s’eigrejant, nous sourriguè! Que de causo, dins soun sourrire angeli! «Veses, nous disié, revène ! Coume ? plouras mai ? Partirai plus, semblavo apoundre»... — E, nous restè!

Que troubarés, pièi, d’estouant que, sus aqueu coumoul de coumbourimen de touto meno, se siegue expandido, la flour counsoulanto de pouèsio! E, pèr traire lou desboude de mi lagno, pièi de ma joio e de moun gramaci, poudiéu-ti faire autramen que de deveni